

EVENC

Te Museo l segnaliber é doventà na tascia

I banner de la scomenzadiva »L segnaliber che volesse« ciapa neva vita. I vegn prejenté en mercol ai 8 de mèrz te Museo Ladin, che per la festa de la femenina envia ence a n 'aperitif a km 0'.

L Museo Ladin de Fascia se verteeva per na festa de la femenina dalbon fora de anter. En mercol ai 8 de mèrz, da les 17:30, l se entenc de resa per n fin unich e originèl: la prejentazion de la neva linea de tasces, prossaches, sciatui e portalapijés metuda fora ensema coi prodoc locai del projet «Alimentare Cultura». Doi ejempies de produzion locala che va ensema per ge voler ben a sia tera.

Via per l 2022 la Majon di Faschein à portà inant na campagna identitèra coi banners aiegres e da color nasciui dai dessegnes del concors «L segnaliber che volesse» endrezà da la Biblioteca Ladina Père Frumentio Ghetta. Ades chisc banners à ciapà na vita neva deventan toc unics che vegrà venui te Museo Ladin. Se trata de na produzion REDO: ogne toch l è stat confezionà biot a man tel Trentin e l è caraterisà da garanzies ecezionèles de sostegniboltà e de tegnuda, dut personalisà 'Majon di Faschein'.

El fosc na ocasion miora che i 8 de mèrz, festa de la femenina, per portèr dant la neva, sporjan na idea per n don alternatif?

E se a chesta neva se met apede la oportunità de n 'aperitif a km 0' tel chèder de la colaborazion del Museo col projet «Alimentare Cultura», dut doventà amò più enteressant e golous. Chest projet nasc per sensibilisèr la popolazion e didér do n stil de vita san, che se cruzie scialdi de la alimentazion e di picoi produtores del post. L projet trienal, sostegnù tel bando Welfare km 0, vegn finanzià da la Fondazion Caritro e te Fascia l tol ite desvaliva realtèdes del teritorie, anter chestes la coprativa sozièla 'Le Rais', ent che va dantfora,

l Comun General de Fascia co-finanziador, la Scola Ladina, l'Azienda provinzièla Servijes Sanitères e la Coprativa de Fascia. Dant de descrir chel che arà da perferir i produtores che con gaissa se à dat ju per la scomenzadiva, l publich podarà se parèr via te la sales del Museo co na curta vijita a tem piissèda apostà per leèr l argoment de la produzion alimentàra co la conties de vèlch personaje feminin che à popolà la storia de Fascia, seran su l cerchie de chest event dedicà a la femenina. Na ocasion saorida, donca, per fèr o se fèr n don, do l lonch troi de «L Segnaliber che volesse», per cognoscer per la pruma outa l Museo o l vijitèr endodanef, per sostegnir la produzion a km 0 de noscia firmes del post e chiamèr per n aperitif, no demò al feminin. Ajache per respetèr noscia desvalivanza linguistica e culturèla no se pel fèr condemanco de respetèr l ambient e l raion olache vivon.

La Majon di Faschein chier jeghes da n'outa

La Majon di Faschein la è do che la endreza n projet sui jeghes da zacante Fascia. De legn, de peza o de etres materièli. N èste ence tu te cèsa, jun cèvena, o su per aut? O te recordest, o te èi contà de jent che i fajeja, o che zipièa fora chiena e jia a la vener via per Gherdëna o utró? Deidene recordèr e meter ensema i toc de chesta storia maraveousa. Doventa ence tu protagonist per tegnir su l recort de noscia reijes, ma no pa demò: deidene endrezèr zeche da nef, desvalif e curious! Chiama ite l Museo Ladin al 0462 760182.



La neva tasces nasciudes dal Segnaliber.



L Museo endreza n projet sui jeghes da n'outa.